

# PREZIDENTE REPÚBLIKA VETO ORSAMENTU JERAL ESTADU 2019 - Presidência da República de Timor-Leste

23 Janeiro 2019

## DEKLARASAUN BA IMPRENSA

Iha loron 24 Dezembru 2018, Prezidénsia Repúblika simu hosi Parlamentu Nasional, Dekretu Parlamentu Nasional n° 4/V – Orsamentu Jeral Estadu 2019, liuhosi ofísiu hosi Señor Prezidente Parlamentu Nasional, ho referénsia 201/GPPN/XI/2018.

Tinan ida ne'e, Parlamentu Nasional aprova Orsamentu Jeral Estadu ida ne'ebé boot liu Orsamentu hothotu ita iha to'o ohinloron. Osan atu gasta iha 2019 hamutuk dólar amerikanu billaun rua no atus ida tolu nulu resin rua (2. 132 millaun). OGE 2019 liu OGE 2017, porsentu lima nulu resin tolu pontu hitu, (53,7%) no liu OGE 2018, porsentu neen nulu resin neen, pontu sia (66,9%).

Haree ba kbiit sira ne'ebé Konstituisaun Repúblika fó, liuhosi alínea a) artigu 85° no número 1, artigu 88°, Sua Exelénsia Prezidente Repúblika deside veta Dekretu n° 4/V hosi Parlamento Nacional – Orçamento Geral Estadu ba 2019, liuhosi nensájen fundamentada ba Parlamentu Nasional, iha 23 Janeiro 2019.

Iha mensájen ne'e Sua Exelénsia Prezidente Repúblika haklaken kona-ba ninia desizaun veta ho kbiit hosi Konstituisaun Repúblika, liuhosi artigu 88, número 1.

Sua Exelénsia Prezidente Repúblika veta tanba:

- **OGE 2019 hamenus liután sustentabilidade.** OGE 2019, ho valór bilaun rua no atus ida tolu nulu resin rua mosu iha ita-nia istória política fiskál nu'udar orsamentu aas liu. Valór aas tebtebes ne'e signífika defisit orsamentál mós aas tebtebes katak Estadu tenke foti osan tan atu kompleta Orsamentu ne'e. Tanba la iha fonte seluk atu hatama osan ba Orsamentu ne'e, Estadu tenke foti hodi biit osan liután hosi Fundu Minarai. Ba OGE 2019, Dekretu Parlamentu Nasional husu atu foti tan porsentu atus rua haat nulu resin sia (249%), liu dook Rendimentu Sustentável Estimadu Fundu Minarai nian. Tuir lolos hasai de'it dólar amerikanu millaun atus lima rua nulu resin sira, ka porsentu tolu, hosi Fundu Minarai, ne'ebé hanesan sasukat ka kalkula tinan-tinan.

Maibé ita labele haluha katak presu mina iha merkadu mundiál mós tun dadaun ona no osan ne'ebé tama iha Fundu Minarai mós tun dadaun ona. Ita mós hatene katak volume minarai hosi kampu Bayu-Undan mós tun dadaun ona no sei tun babeibeik. Bayu-Undan sei maran loron ruma no osan sei la tama tan husi kampu mina ne'e. Fundu ne'e labele sai sustentável bainhira Estadu hasai osan barak beibeik, liu RSE hosi Fundu Minarai. Ho ritmu transferénsia hanesan ne'e, ita sei hamamuk Fundu ne'e lalais liu, no ita nia osan ne'e sei mohu iha tempu badak.

Governu rasik fó-sai dadus katak seidak hetan alternativa finansiametu hosi rekursu minarai foun seluk. Biar Governu fó-sai estimativa ida ne'e, Governu la foti medidas atu kaer metin sustentabilidade financeira.

- **OGE 2019 la hatuir Konstituisaun no lei estruturante sira.** Haree ba política ekonómika no financeira temi iha leten, OGE 2019, la hatuir regras no prinsípios Konstituisaun RDTL no lei sira ne'ebé fó dalan ba dezvoltimentu, hanesan rezerva financeira obrigatória, unidade orsamentál no investimentu ne'ebé justífika hetan tranferénsia direta hosi Fundu Minarai.

Proposta OGE 2019 mós la hatuir Programa Governu ne'ebé aprova hosi Parlamentu Nasional kona-ba diversifikasaun ekonómika no harii empregu no tau prioridade atu investe iha kapitál sosiál, ita-nia ema nu'udar rekursu boot liu, no dezvoltimentu ekonómiku.

- **Dezekilíbriu Orsamentál aas tebtebes.** Alokasaun orsamental sira ladún fó benefísiu ba sidadaun sira. Osan boot liu katak pur sentu tolu nulu resin rua (32%) ka tersu ida (1/3) hosi OGE aloka ba sos<sup>a</sup> patrimoniu hosi kompañia estranjeira mina nian. Porsentu sanulu de'it (10%) mak fahe ba edukasaun no formasaun profesionál, saúde, agrikultura no turismu. Hosi porsentu sanulu ne'e (10%), porsentu ida (1%)tau ba agrikultura, maisounenus porsentu neen (6%) ba sektor edukasaun no porsentu tolu (3%) ba sektor saúde no porsentu zero pontu lima nulu resin hat (0.54%) tau ba turismu. Valor kiik ne'e labele satisfáz nesidades iha área servísiu sosiális no la fó dalan ba kreximentu ekonómiku iha área sira ne'e.
- **La iha política alternativa.** OGE 2019 la hatudu política alternativa finansiametu ne'ebé bele konzense katak, biar la'ós sustentável, ita bele lao ba oin, no iha prazu badak no médiu, ita bele hala'o dezvoltimentu sustentável no Estadu sei la tama iha falénsia financeira ka **fiskal cliff** no mosu fenómenu ne'ebé baibain ema bolu “maldisaun rekursus nian”.

Ho kbiit Konstituisaun Repúblika nian, Prezidente Repúblika hala'o ninia direitu veta Dekretu Parlamentu Nasional n° 4/V – Orsamentu Jeral Estadu 2019, no liuhosi mensajen fundamentada, husu ba Parlamentu Nasional atu tetu fila fali Dekretu ne'e ho hanoin katak ita tenke uza ho di'ak rekursu financeiru sira ne'ebé pertense ba Estadu no Povu Timor-Leste. Bainhira uza rekursu sira ne'e liuhosi dalan justu, ekilibradu, sustentável no efisiente liután mak ita bele satisfáz nesidades loronloron Povu nian no fó dalan ba kreximentu no dezvoltimentu nasional, no garante sustentabilidade ba ita nia ekonomia hodi fó moris di'ak ba ita nia oan no bei-oan sira iha futuru!